

Te Fascia l model é jà stat aproà, ma...

Fabio Chiocchetti: L'Istitut no é stat domanà. Me fegure che no fossa problemes a l riveder per fèr n soul model duc medemo

Te Fascia la neva Chèrta d'Identità ence per ladin no la é amò ruèda concretamenter, anzi a la dir duta no la é amò ruèda nience al Comissariat del Goern de Trent. Ampò l model é jà stat aproà dal minister tel meis de november passà. L'iter da la normes de atuazion per la Provinzia de Trent é peà via jà da vèlch an e acà passa n an l Comprenjorie Ladin à endrezà l test, che l'é per fascian standard. Ge aon domanà vèlch de più sun co che l'é stat tout chesta dezijion al diretor de l'Istitut Cultural ladin de Fascia, Fabio Chiocchetti.

Chi él stat a dezider che che aea da vegnir scrit su la chèrta d'identità ladina per Fascia?

Fabio Chiocchetti: "La dezijion per Fascia en cont de chest é stata tutta da l'ofize linguistich del Comprenjorie e dal Servije per la mendranzes, e l'Istitut no é vegnù

consultà."

Saede per coluna rejon che l'é stat dezidù cuscita?

"L'é stat cernù l fascian ajache te chel moment no pareva possibol che Badia e Gherdena se orientee envers l ladin standard, e donca fossa stat vagà che demò te Fascia vegne durà chesta forma."

E pissède che chesta sie la soluzion miora?

"Per n tël document gé son a una con chel che disc l'ombolt Pepi Dejacò: te na ocasion desche chesta fossa stat da durèr te dutes trei la valèdes l ladin dolomitan, e me fegure che se te Badia e Gherdena fossa na desponibilità de chest vers, ence Fascia no l'aessa problemes a veder de nef chela posizion per jir del medemo vers."

Che pissède de la discusion vegnuda fora?



Fabio Chiocchetti, diretor de l'Istitut Cultural Ladin de Fascia.

"Peisse che amò n'outa se desmostra che l livel normatif per i ladins l'é più inant respet a la coscienza de idendità che aon, e donca fosc cerc recognoscimenc no se i meritassane nience."